

REGIONAL NEWS

HEADLINES:-

1. Mara tlang sang ber Mawma tlang a 'Ecological Park' chu vawiin khan Tourism Minister Pi Lalrinpuin a hawng.
2. Dy Govt Chief Whip, Tuichang bialtu MLA Pu W. Chhuanawma chuan vawiin khan Tlangpui khuaah Varhva lei a hawng.
3. Narendra Modi-a kaihhruai sorkar laipui thar la lut turin inbuatsaihna, ngawrh taka kalpui mek a ni.
4. National Testing Agency-in National Eligibility-cum-Entrance Test kalphung rinawm dan a la pangngai reng tih a sawi.

<><><>

TOURISM MINISTER

Mara tlang sang ber Mawma tlang a 'Ecological Park' chu vawiin khan Tourism Minister Pi Lalrinpuin a hawng a, hawna inkhawm hi Chakhei- I Upper Primary School, ah neih a ni.

Pi Lalrinpuin chuan Zofaten tangkai taka an chhawr tur leh a duh apiangte tana tlawh theih turin 'Mount Mawma Ecological Park' chu lawm takin a hawng tih a sawi a. A enkawl mek Tourism Department- in hnathawh tur hmachhawp tam tak a nei a, a bik takin Mizoram pawn lam atanga Khualzin tam zawk hip tum mek a ni, a ti a. Siaha district pawhin Tourism department hmalakna hi a chhawr dawn hle tih sawiin, vawiina hawn tak 'Mount Mawma Ecological Park ' pawh hian tlawhtu tamtak neih belh zelin Chakhei mipuiten hlawkna tam zawk an nei dawn a ni, a ti.

Pi Lalrinpuin chuan Siaha district chungga khaw then khat Community Hall la nei lo te tan theihtawp a chhuah mek tih a sawi a. Mi tam takin an tlawh fo thin 'Beino Caslte' panna kawng laihna turin Asian Development Bank (ADB) atanga sum leh pai hmuh a beisei awm hle tih a tarlangin Mizoram sawrkarin Mara mipuite a theihngilh ngai dawn lo a ti a. Sawrkar chu Mizoram mipuite tana awm a nih angin mipuite sawrkara rinna nghat ngam turin a chah bawk.

Report atanga a lan danin, Mount Mawma Ecological Park, Chakhei siamna tur hian North Eastern Council (NEC) atangin cheng nuai 236 sing 1 sang 7 hmuh niin, M & M Construction & Consultancy, Ramhlun Vengthar, Aizawl ten hna hi an thawk a.

Mount Mawma Ecological Park -ah hian Trekking/Hiking route- Mawma tlang chhip thlengin Cubic lung hmanga steps siam a ni a, Trekking/ Hiking route- ah hian chawlhahdamna tur pathum siam tel a ni bawk. Suspension bridge pawh siam niin, Camping Ground- panga bakah Watch Tower leh Entry Gate- te siam tel a ni a. Wildlife Enclosure- Birds net-128, fencing- 946 m, Artificial Pond- 1 siam niin, Orchid-460 phunthar a ni bawk.

<><><>

AGRI MINISTER

Agriculture Minister Pu Vanlalruata chuan Khawzawlah a department chuan hnuai office pathum - District Agriculture Office, & Krishi Vigyan Kendra (KVK) leh Irrigation & Water Resources Department Office te a tlawh.

Agriculture Minister Pu Vanlalruata hi office hotu ten lo dawngsawngin, Department hmalakna leh hmachhawp te a hnenah hian an lo thlen a. Minister ho hian kuthnathawktute tana hmasawna tur hrang hrang te an sawi ho a ni.

KVK, Khawzawl-a inkawmhona hunah hian Dr. Malsawmkimi Senior Scientist & Head chuan KVK te hnathawh dan, loneitute hnena enchhinna hrang hrang an lo neih tawh dan leh an hlawhtlin pui tawh te Power Point Presentation hmangin a entir a ni.

Pu Vanlalruata chuan kuthnathawktute tana KVK hnathawh pawimawh zia sawiin, KVK a thawkte thahnemngai taka thawhona tha tak neih chhonzawm zel turin a fuih.

<><><>

EXCISE MINISTER

Aizawl Vaivakawn khawtlang in ruihhlo do beihpui hawn inkhawm, an huam chhunga a senchi lane tia hriat hmuna an buatsaih chu vawiin khan Excise Minister Lalnginglova Hmar chuan a hmanpui.

Excise Minister chuan zu leh ruihhlo do kawngah khawtlang nena tanho loh chuan sorkar ringawt chu tha a chak tawk lo tih sawiin, mihring leh hmanruahte an indaih tawk lo a, khawtlang nen theih tawpa tan ho a ngai tih a sawi.

Vaivakawnin zu leh ruihhlo an dona-ah sorkar anga tihve theih a awm chuan theihtawp an chhuah dawn a ti a, mimal ang pawha theihtawp chhuah a tum tih a sawi bawk a ni.

Pu Lalnginglova Hmar chuan Vaivakawn khawtlang hruaitute nen ruihhlo do beihpui thlak chungchangah tum thum an inkawm tawh thu sawiin, hun, sum leh tha a duh avangin an huphurh pawh awm a tihpui a, mahse khawtlang kalkhawmin zu leh ruihhlo laka fihlim veng ni turin huaisen taka thutlukna siam an nih thu a sawi.

Excise Minister hian ruihhlo do bultanna atan Vaivakawn khawtlang hnenah hian Cheng 20,000 hlanin a tul anga ngaihtuah zel a nih tur thu a sawi.

<><><>

VARHVA BRIDGE

Dy Govt Chief Whip, Tuichang bialtu MLA Pu W. Chhuanawma'n vawiin khan Tlangpui kuaah Varhva lei a hawng.

Varhva lei hi Tlangpui leh Khawlailung inkalpawhna tangkai tak a ni dawn a, Mizoram khaw chhak lam leh chhim lam district te inkalpawhna nasa takin a tihnai dawn a ni. Lei hi feet 9 a zau, feet 10 a sang, a ban leh ban inkar teha feet 29 a thui a ni. Lei siam nan hian cheng nuai 5 leh sing 8 hman a ni. Lei dawh nan hian khawtlang leh mi thahnemngai ten tha leh sum nasa takin an thawh a, heng zawng zawng nena chhut hian nuai 10 chuang seng anga ngaih a ni.

Lei hawna inkhawm Tlangpui Community Hall-a neihah hian Pu W. Chhuanawma chuan Tlangpui khawtlang ten sawrkar tha chakna beisei mai lova, tanrualna hmanga lei an dawh chu ropui a tih thu sawiin Zoram puma puandarh tlak chanchin ngaihnam leh ropui a ni, a ti a. Tuichang bialtu MLA

hian Tlangpui khaw hmalakna chu Mizoram khaw dangte tan pawha entawntlak nia a hriat avangin Assembly House-ah hial pawh a lo sawi chhuak tawh a, Assembly Recess Room-ah ngei pawh Member dang ten hriat chian chakin an zawt zui tih a tarlang.

He huna thusawitu dang MIFCO Chairman Pu Lalthazuala Royte chuan MIFCO chu loneitute leh kuthnathawktute banphakah awm an tum tih a sawi a. Bialtu MLA Pu W. Chhuanawma ruahmannaa sapthei leh lakhuihthei chingtute kawmna hun tha a nei thei chu lawmawm a tih thu a sawi bawk. Kuthnathawktu ten man man zawk leh hlawk zawka thlai an hralh theih nan sawrkarin hma a la dawn a, mipuite chu taima taka hna lo thawh chhonzawm zel turin a ngen a ni. Varhva lei hawna inkhawm hi Tlangpui VCP Pu Lalbiaktluanga chuan a kaihruai a ni.

<><><>

SERCHHIP POLICE

Serchhip Police ten nimin khan Serchhip Darnam Venga Pi Lalduhzuali in atangin AK-47 silai mu 1980 leh an lirthei hman Myanmar bike, CANDA -125 an bakah, neitua puh Lal nunnema kum 31, Lalkima fapa Thantlang leh Lalchhanhima kum 44 Than tlang khua te pawh manin, an silai mu man hlut zawng hi Bazar rate a chhutin cheng nuai 10, sing 8, sang 9 hu a ni.

Nimin vek khan Lunglei Excise and Narcotics dept leh 20AR Lunglei te chuan jt operation Lunglei khawchhungah an nei a , heroin leh a neitu C. Vanlalnghaka kum 30 mi chu man a ni a,

He thila inhnamhnawih leh Lunglei a lo thawntu hi man tawh ani na in Lunglei la thlen pui ala nilo a ni.

<><><>

MIZORAM SPORTS CONCLAVE

Sports & Youth Services Minister Pu Lalnghinglova Hmar chuan vawiin khan chanchinbumite kawmin Olympics 2026 a Mizo infiammi a tam thei ang berin Olympic Medal an awrh theihna tura inbuatsaihna hmasa Mizoram Sports Conclave chu Baptist Centre, Falkland Aizawl-ah June ni 13 leh 14 hian neih a dawn tih a sawi.

Sports Minister chuan he conclave hi India ram State zingah Mizoram chu Olympics 2026 vision nei a National level Sports Conclave buatsaih hmasa ber a ni, a ti.

Hmarchhak biala State pathum Sports Minister bakah Sorkar laipua mi pawimawhte- Tata Trusts, Reliance Foundation Sports, Tata Steel leh Inspire Institute of Sports-a an hotute mai bakah India ram chung leh pawna prominent sportperson leh thutharthehdarhtute, Olympic sports discipline a Indian Federation/Association hruaitute, Mizo Olympian C.Lalremsanga leh Lalremsiami te bakah infiammi hlawhtling dangte pawh an tel dawn tih a sawi a. Conclave neihna atan hian Scheme of Human Resources Development in Sports (HRDS) chuan cheng nuai 68 sing 8 & 500 an pe niin a sawi bawk.

<><><>

MODI TO BE SWORN IN

President Droupadi Murmu-i'n sorkar laipui siam tura Narendra Modi-a a sawm hnuah nakzana sorkar thar la lut turin inbuatsaihna kal pui mek a ni a, ruahman dan chuan lak luh inkhawm hi zan dar 7:15-ah Rashtrapati Bhavan-ah neih a ni ang a, President-in Prime Minister atan Pu Modi-a, rinawmna thu tiam tirin a la lut ang a, Council of Minister turte pawh a la lut nghal ang.

Akashvani Corr sawi danin, sorkar thar lak luh inkhawma tel tur hian ram thenawm hrang hrang hruaitute sawm an ni a, External Affairs Ministry sawi danin, Sri Lanka President, Ranil Wickremesinghe, Maldives President, Dr. Mohamed Muizzu leh Seychelles Vice President, Ahmed Afif-a te bakah Nepal, Bangladesh leh Bhutan Prime Minister-te pawh sawm an ni.

Puan tawh angin, tun hi Narendra Modi-a'n a zawna Prime Minister term thum a chelna tur a ni a, seat 543 awmna, Lok Sabha inthlanpui zawh fel takah khan BJP kaihhruai NDA hian seat 293 an la a ni.

<><><>

CWC'S RESOLUTION

Congress Working Committee (CWC) thukhawm chuan Rahul Gandhi-a, Lok Sabha-a eptu leader mawhphurhna chelh tura ngenna resolution, lungrual takin an pass. Thutkhawm zawha thuthar lakhawmtute a kawmnaah Cong hruaitu senior, KC Venugopal-a chuan Rahul-a kaihhruaina hnuai ah opposition chak leh viak tha tak din a ni ngei ang tih CWC chuan a ring tlat a ni, a ti.

CWC thutkhawm-ah hian party hruaitu senior Sonia Gandhi, Rahul Gandhi leh Gen Secy, Priyanka Gandhi Vadra-te bakah party hruaitu pawimawh dangte an tel a ni.

<><><>

NEET EXAMINATION NOT COMPROMISED SAYS NTA

National Testing Agency (NTA) chuan National Eligibility-cum-Entrance Test chu lang tlang taka kalpui anih thu sawiin a kalphung rinawm dan, ram pumah a la pangngai reng a ni, an ti.

MBBS leh BDS college-a lut thei tur thlanna, NEET exam hi kumin hian May ni 5 khan neih a ni a, June ni 4 khan result tih chhuah a ni. Tun tum exam-a thil fello awm nia sawi chungchangah NTA Director General, Subodh Kumar Singh-a chuan zawhna putru a awmlo, a ti a, exam zawhna diklo sem chhuah avang erawh chuan candidate 1600-in hun an hloh phah tih sawiin heng mi 1600-te lungawilohna chhui chiang tur hian High Powered Commt. din a ni, a ti bawk.

<><><>